

MPN/plc

**ACTA DA SESIÓN ORDINARIA DA COMISIÓN INFORMATIVA DE COOPERACIÓN  
MUNICIPAL, COOPERACIÓN TRANSFRONTEIRIZA E COHESIÓN SOCIAL DO DÍA  
18/11/2022**

ASISTENTES

PRESIDENTE:	D. Santos Héctor Rodríguez Díaz
SUPLENTE	D <sup>a</sup> . Olga María García Ballesteros
VOGAIS:	D <sup>a</sup> . Ana María Mejías Sacaluga
	D. Gorka Gómez Díaz
	D <sup>a</sup> . Raquel Giráldez Armas
	D. Manuel González Martínez
	D. Carlos López Font, en substitución de D. Gregorio Agís Gómez
	D <sup>a</sup> . Iria Lamas Salgueiro
	D. José Carlos López Campos
	D. Jorge Cubela López
	D. Manuel Alejandro Lorenzo Alonso
	D <sup>a</sup> . María Paz Lago Martínez
	D. Ignacio Maril Pardo
	D. José Alfonso Marnotes González
	D. Javier Tourís Romero
	D. Xosé Cesáreo Mosquera Lorenzo
	D <sup>a</sup> . María Ortega Iñarrea, en substitución de D. Uxío Benítez Fernández

Sendo as doce horas e dez minutos do día dezaioito de novembro do ano dous mil vinte e dous, reúnen-se no Pazo Provincial os Sres./as. Deputados/as arriba relacionados, en sesión ordinaria, e baixo a Presidencia de D. Santos Héctor Rodríguez Díaz. Actúa como secretaria a xefa do Servizo de Cooperación, D<sup>a</sup>. Marina Piñeiro Novo.

Aberta a sesión polo Presidente, pásase ó estudo dos asuntos incluídos na Orde do Día, sobre os que recaeron os seguintes ditames:



## **1.- APROBACIÓN DA ACTA ANTERIOR**

Apróbase a acta da sesión anterior correspondente á sesión ordinaria celebrada o vinte e un de outubro do ano dous mil vinte e dous co voto favorable de todos os membros da Comisión.

## **2.- DITAMINAR A APROBACIÓN DO CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA A PROMOCIÓN DA ACTIVIDADE FÍSICA E DEPORTIVA (Expte. 2022067061)**

De conformidade co establecido nos artigos 123 a 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, sométese ao Ditame da Comisión Informativa de Cooperación Municipal, Cooperación Transfronteiriza e Cohesión Social a seguinte proposta de acordo con carácter previo á súa elevación ante o órgano competente para a súa aprobación:

***“ASUNTO: APROBACIÓN DO CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA A PROMOCIÓN DA ACTIVIDADE FÍSICA E DEPORTIVA***

### **ANTECEDENTES**

- *A Deputación Provincial de Pontevedra e o Concello de Pontevedra, no exercicio das súas respectivas competencias, en orde a afondar na colaboración administrativa entre ambas institucións, desexan establecer as pautas de colaboración para o desenvolvemento de diversas actividades no marco da programación deportiva do Concello.*
- *Para dar cumprimento ao obxectivo referido no parágrafo anterior, en data 04/11/2022 o Concello de Pontevedra presenta no Rexistro da Deputación (núm. Rexistro 2022025173) a solicitude e demais documentación necesaria para a formalización do correspondente convenio co que se financiarán por parte da Deputación a realización das seguintes actividades:*
  - *XL Gran Fondo - XXVII Medio Maraton e III 10K Pontevedra 2022*
  - *XXXIX Carreira pedestre San Silvestre Pontevedra 2022*
- *Na data 07/11/2022 a xefa do Servizo de Cooperación informa sobre o interese público da actuación (CSV: HD7S49PTIWQXEVTD) e, pola súa banda, a Intervención provincial emite informe de fiscalización favorable do expediente o 11/11/2022 (CSV: XX9SG8WIYCSXBIBA).*
- *Así mesmo, sométese ao ditame da Comisión Informativa de Cooperación cos Municipios,*



*Cooperación Transfronteiriza e Cohesión Social.*

## **FUNDAMENTOS DE DEREITO**

### **Réxime xurídico**

- *Lei 38/2003, de 17 de novembro, xeral de subvencións (LXS), e o seu Regulamento, aprobado por Real Decreto 887/2006, de 21 de xullo (RLXS)*
- *Lei 7/1985, de 2 de abril, reguladora das bases do réxime local (LRBRL)*
- *Lei 5/1997, de 22 de xullo, reguladora da administración local de Galicia (LALGA)*
- *Lei 39/2015, de 1 de outubro, do procedemento administrativo común das administracións públicas (LPACAP)*
- *Lei 40/2015, de 1 de outubro, de réxime xurídico do sector público (LRXSP)*
- *Lei 9/2007, de 13 de xuño, de subvencións de Galicia (LSG)*
- *Lei 19/2013, de 9 de decembro de transparencia, acceso á información pública e bo goberno.*
- *Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014*
- *Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais (ROFRXEL)*
- *Real Decreto Legislativo 2/2004, de 5 de marzo, polo que se aproba o texto refundido da Lei reguladora das Facendas Locais (TRLRFL)*
- *Ordenanza xeral de subvencións da Deputación de Pontevedra, aprobada no Pleno provincial do 28 de outubro de 2016 e publicada no BOPPO do 30 de decembro de 2016*
- *Bases de execución do orzamento da Deputación para o exercicio 2022*

### **Consideracións xurídicas**

#### ***Petición e evacuación de informes***

- *Artigos 79 e 80 da LPACAP, sobre a petición e a evacuación de informes.*
- *Artigo 88.6 da LRXAP, que sinala que a aceptación de informes ou ditames servirá de motivación á resolución cando se incorporen ao texto da mesma.*
- *Artigo 213 e ss. do TRLRFL, sobre o control e a fiscalización da xestión económica que lle corresponde realizar á Intervención.*
- *Artigo 172 do ROFRXEL, que dispón que o xefe da Dependencia á que corresponda tramitar o expediente deberá emitir un informe, expoñendo os antecedentes e as disposicións legais ou regulamentarias en que funde o seu criterio.*
- *Bases 47ª e 48ª de execución do Orzamento provincial para 2022, sobre o control e a fiscalización da xestión económica, que sinalan a competencia da Intervención para realizar esta función.*



- *Artigo 24 da LXS, que establece que as actividades de instrución comprenderán, entre outras, a petición de cantos informes se estime necesarios para resolver ou que sexan esixidos polas normas que regulan a subvención.*

### **Procedencia do convenio**

- *Artigo 47 e ss. da LRXSP, que dispoñen que os convenios de colaboración constitúen o instrumento adecuado para desenvolver a cooperación en cuestións de interese común.*
- *Artigo 57 da LRBRL, que dispón que a cooperación en servizos locais desenvolverase con carácter voluntario, baixo as formas e nos termos previstos nas leis, podendo ter lugar, en todo caso, mediante convenios administrativos, en conexión co artigo 195.h) da LALGA.*
- *Artigo 198 da LALGA, que establece que as entidades locais poderán celebrar convenios de cooperación entre si para a máis eficaz xestión e prestación de servizos da súa competencia. No seu apartado 2º dispónse que a través dos convenios de cooperación as partes poderán coordinar as súas políticas de fomento dirixidas a un mesmo sector e distribuír as subvencións outorgadas por unha delas; ademais, o apartado 3º sinala que, en especial, as Deputacións Provinciais poderán subscribir, cos municipios da provincia, convenios para garantir o acceso da poboación ao conxunto dos servizos municipais.*
- *Artigo 199 da LALGA, que, en consonancia co artigo 49 da LRXSP, sinala as especificacións que deberán conter os instrumentos de formalización dos convenios.*
- *Artigo 6 da LCSP, que exclúe do seu ámbito de aplicación os convenios, cuxo contido non estea comprendido no dos contratos regulados nesta Lei ou en normas administrativas especiais celebrados entre si pola Administración Xeral do Estado, as entidades xestoras e os servizos comúns da Seguridade Social, as Universidades Públicas, as Comunidades Autónomas e as Cidades Autónomas de Ceuta e Melilla, as entidades locais, as entidades con personalidade xurídico pública delas dependentes e as entidades con personalidade xurídica privada, sempre que, neste último caso, teñan a condición de poder adjudicador.*
- *Artigo 2 da LXS, polo que a achega económica da Deputación de Pontevedra ten o carácter dunha subvención. O artigo 22.2 da LXS sinala que se poderán conceder, con carácter excepcional, de forma directa subvencións nas que se acrediten razóns de interese público, social, económico ou humanitario, ou outras debidamente xustificadas que dificulten a súa convocatoria pública.*
- *Artigo 28.1 da LXS, que establece que a resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables de conformidade co disposto nesta Lei.*

### **Competencia das administracións**

- *Artigo 25.2 da LRBRL, que, en concordancia co artigo 80.2 da LALGA, atribúe, entre outras, ás administracións municipais a competencia en materia de promoción do deporte e instalacións deportivas e de ocupación do tempo libre.*
- *Artigo 31 da LRBRL, que encomenda ás deputacións que dirixan a súa actividade a asegurar a prestación integral e adecuada dos servizos de competencia municipal, recolléndose no seu artigo 36 como competencia propia das deputacións a asistencia e*



*cooperación económica aos concellos. A estes efectos, a Deputación asegura o acceso da poboación da provincia ao conxunto dos servizos mínimos de competencia municipal mediante calquera fórmula de asistencia e cooperación municipal, para o que poderá outorgar subvencións ou axudas con cargo as seus recursos propios para a realización e mantemento de obras e servizos municipais.*

- *Artigo 109 da LALGA, que atribúe ás deputacións competencias en xeral no fomento e administración dos intereses peculiares da provincia, de xeito que cabe subsumir nas ditas materias, formas específicas de cooperación económica como a concesión de subvencións recollida no art. 114.c) da LALGA.*

### **Competencia para resolver**

- *Artigo 8.2 da Ordenanza xeral de subvencións da Deputación de Pontevedra, que en virtude do establecido na base 16.2 das Bases de execución do orzamento provincial, e de conformidade co disposto nos artigos 35 da LRBRL e 10 da LXS, atribúe a competencia para resolver á Xunta de Goberno.*

### **CONCLUSIÓNS**

*En base ás precedentes consideracións e ao interese público que representa esta actuación, a Deputación e o Concello de Pontevedra conveñen a súa colaboración neste ámbito, para desenvolver un réxime de colaboración entre ambas administracións locais para o desenvolvemento de diversas actividades no marco da programación deportiva e de lecer do concello, así como a promoción da cidade de Pontevedra.*

*Neste senso os convenios de colaboración constitúen o instrumento idóneo para canalizar esta colaboración.*

*O Concello de Pontevedra presentou a documentación necesaria para formalizar este convenio e quedan acreditadas no expediente as razóns de oportunidade, a valoración económica das actuacións a desenvolver e o propio obxecto do convenio.*

*Por todo o exposto, e tendo en conta os antecedentes e fundamentos de dereito aplicables, INFORMO FAVORABLEMENTE a tramitación do dito convenio de colaboración entre ambas administracións.*

*Este informe non ten carácter vinculante, de feito que o órgano concedente co seu superior criterio decidirá.*

*Á vista do anterior, sométese a ditame da Comisión Informativa de Cooperación Municipal, Cooperación Transfronteiriza e Cohesión Social a seguinte PROPOSTA DE ACORDO:*

- *Aprobar o Convenio de colaboración entre o Concello de Pontevedra e a Deputación Provincial de Pontevedra para a promoción da actividade física e deportiva.*

*Este convenio, cuxo texto literalmente transcrito di como segue, condiciónase á súa aprobación polo Concello de Pontevedra:*



**“CONVENIO DE COLABORACIÓN ENTRE O CONCELLO DE PONTEVEDRA E A DEPUTACIÓN PROVINCIAL DE PONTEVEDRA PARA A PROMOCIÓN DA ACTIVIDADE FÍSICA E DEPORTIVA**

*En Pontevedra, na data da sinatura electrónica*

**INTERVEÑEN**

*Dunha parte, D.<sup>a</sup> María del Carmen Silva Rego, quen actúa no nome e representación da Deputación Provincial de Pontevedra, en virtude do seu cargo como presidenta deste organismo e en función das atribucións que lle confiren o artigo 34.1.b) da Lei 7/1985, de 2 de abril, reguladora das bases do réxime local (LRBRL).*

*Doutra, D. Miguel Anxo Fernández Lores, quen actúa no nome e representación do Concello de Pontevedra, en virtude da súa condición de alcalde-presidente da citada Corporación, segundo o disposto no artigo 124 da LRBRL.*

*Actúan D. Carlos Cuadrado Romay, en calidade de secretario xeral da Deputación de Pontevedra, e D. José Carlos Castiñeira Piñeiro, en calidade de secretario da Administración Municipal do Concello de Pontevedra, dando fe do acto que se celebra.*

*As partes actúan nas representacións expresadas e recoñécense reciprocamente capacidade bastante para o outorgamento e formalización deste convenio, con base nos principios de colaboración, cooperación, coordinación e eficacia que deben presidir as actuacións das Administracións Públicas e, a estes efectos, de común acordo,*

**EXPOÑEN**

*I. A Deputación de Pontevedra e o Concello de Pontevedra comparten como criterio que os concellos, como administración democraticamente escollida, deben ser os axentes protagonistas e os eidos administrativos aos que ten que corresponder a decisión, o deseño e o impulso da acción local e do desenvolvemento das políticas locais; ao tempo que, as deputacións, deben actuar como institucións que desenvolvan políticas, plans e actuacións que faciliten que concellos e cidadáns poidan acadaren os mesmos dereitos e servizos.*

*II. Que os artigos 25.1 da LRBRL e 80.1 da Lei 5/1997, de 22 de xullo, de Administración Local de Galicia, dispoñen que o Municipio, para a xestión dos seus intereses e no ámbito das súas competencias, pode promover actividades e prestar os servizos públicos que contribúan a satisfacer as necesidades e aspiracións da comunidade veciñal nos termos previstos neste artigo, exercendo en todo caso como competencias propias, nos termos da lexislación do Estado e das Comunidades Autónomas, nas materias de promoción do deporte e de instalacións deportivas e de ocupación do tempo libre.*

*Por outra banda, o art. 36.1) da LRBRL encomenda ás deputacións o aseguramento da prestación integral e adecuada dos servizos de competencia municipal así como a cooperación no fomento do desenvolvemento económico e social e na planificación no territorio provincial, de acordo coas competencias das demais Administracións Públicas.*

*III. Que os convenios entre as Administracións Públicas constitúen o instrumento axeitado para desenvolveren a súa cooperación en cuestións de interese común, tal como establecen os artigos 47 e seguintes da Lei 40/2015, do 1 de outubro, do réxime xurídico do sector público (LRXSP) e demais normativa de aplicación.*



*IV. Que o Concello de Pontevedra amosou o seu interese no desenvolvemento de diversos programas relacionados coa promoción da actividade física e deportiva no ano 2022. Neste sentido, dentro dos seus obxectivos estratéxicos a Deputación Provincial de Pontevedra ten previsto na súa planificación a mellora das actividades deportivas e de ocupación do tempo de lecer así como a promoción do turismo dos concellos da provincia.*

*Deste xeito, a Deputación Provincial de Pontevedra, nos orzamentos do ano 2022, contempla unha aplicación orzamentaria, para convenios co Concello de Pontevedra.*

*V. Que, de acordo coas precedentes consideracións e en desenvolvemento da colaboración entre o Concello de Pontevedra e a Deputación de Pontevedra, ambas institucións acordan aprobar o presente convenio de colaboración, para o desenvolvemento de actividades de promoción da actividade física e deportiva que asinan agora os aquí comparecentes, con arranxo ás seguintes*

### **CLÁUSULAS**

#### **PRIMEIRA. OBXECTO DO CONVENIO**

*É obxecto deste convenio establecer as pautas de colaboración entre a Deputación Provincial de Pontevedra e o Concello de Pontevedra, para o desenvolvemento de diversas actividades no marco da programación deportiva e de lecer do concello, así como a promoción da cidade de Pontevedra.*

*Os proxectos e actividades deportivas financiadas por este convenio, e que se desenvolverán no último trimestre do ano 2022, son os seguintes:*

- *XL Gran Fondo - XXVII Medio Maraton e III 10K Pontevedra 2022.*
- *XXXIX Carreira pedestre San Silvestre Pontevedra 2022.*

#### **SEGUNDA. IMPORTE E FINANCIAMENTO**

*O custo total das actuacións obxecto deste convenio ascende a setenta mil euros (70.000,00€) con IVE.*

*A Deputación Provincial financiará unha contía máxima de setenta mil euros (70.000,00€), sendo gastos admisibles os que de xeito indubitado respondan á natureza da actividade conveniada e se realicen no prazo comprendido entre o 1 de outubro de 2022 e o 31 de decembro de 2022. A achega da Deputación de Pontevedra financiará o custo total subvencionable máximo das actuacións, con cargo á anualidade 2022 e contra a aplicación 22/942.9420.462.14 do orzamento provincial (Concellos-Investmentos en Convenios (Vigo e Pontevedra)).*

*A achega comprometida pola Deputación consiste nunha contía fixa máxima, e no caso de que as actividades realizadas teñan un custo inferior ao inicialmente previsto e sempre que isto non supoña unha execución deficiente da totalidade das actividades, a contía da subvención reducirase proporcionalmente.*

#### **TERCEIRA. COMPROMISOS DO CONCELLO DE PONTEVEDRA**

*1. O Concello de Pontevedra asume individualmente a obriga da organización e coordinación de todas as actividades realizadas ao abeiro deste convenio.*

*2. O Concello aprobará as correspondentes memorias técnicas, pregos de cláusulas ou documentos análogos que conteñan as condicións dos contratos necesarios para a completa realización das actividades programadas obxecto do convenio, así como calquera outro extremo que fose necesario para a súa execución.*



3. O Concello asume a obriga, de ser necesario, de obter os correspondentes permisos e tramitar ante outros organismos as autorizacións pertinentes que fosen precisas.

4. O Concello comprométese na difusión do evento a facer visible a colaboración da Deputación no seu financiamento.

5. O Concello deberá xustificar as actuacións executadas no prazo máximo de tres meses, dende o fin das actuacións, ante a Deputación.

6. Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden á Intervención Provincial, ao Tribunal de Contas e ao Consello de Contas.

Así mesmo, o Concello comprométese ao cumprimento das obrigas contidas na Lei 9/2007, do 13 de xuño, de subvencións de Galicia, e en especial as recollidas no artigo 11 da mesma. Tamén será de aplicación o establecido no seu Regulamento, aprobado polo Decreto 11/2009, do 8 de xaneiro; na Lei 38/2003, do 17 de novembro, xeral de subvencións, e no seu Regulamento, aprobado polo Real Decreto 887/2006, de 21 de xullo.

7. O Concello obrígase a comunicar á Deputación de forma inmediata, a obtención doutras subvencións ou axudas para a mencionada finalidade procedentes de calquera administración pública ou ente privado nacional ou internacional, con expresión da súa contía.

#### **CUARTA. COMPROMISOS DA DEPUTACIÓN DE PONTEVEDRA**

A Deputación comprométese a financiar os custos derivados da organización dos citados eventos obxecto do convenio, ata a cantidade máxima de setenta mil euros (70.000,00€), de conformidade co sinalado na cláusula segunda, que será librada contra a presentación das correspondentes facturas ou documentos análogos acreditativos do gasto efectuado, así como da restante documentación xustificativa necesaria e logo da súa fiscalización pola Intervención provincial.

A Deputación poderá inspeccionar a execución do obxecto do presente convenio e formular as observacións que estime pertinentes, sen prexuízo de que corresponda en exclusiva ao órgano de contratación e aos responsables dos respectivos contratos a emisión das ordes e instrucións que procedan.

A Deputación prestará a colaboración e facilitará canta documentación lle sexa requirida no exercicio das funcións de fiscalización e control do destino das axudas que lle corresponden ao Tribunal de Contas e ao Consello de Contas, en cumprimento do disposto no artigo 53 da LRXSP e da Resolución Presidencial núm. 2017008767 de 8 de maio de 2017, tratándose así mesmo dun convenio cuxas achegas económicas non exceden de seiscentos mil euros (600.000,00€).

#### **QUINTA. PUBLICIDADE**

En toda a documentación e informacións relativas ás actuacións derivadas do obxecto do presente convenio se incluírá a imaxe corporativa que a este fin facilite a Deputación Provincial de Pontevedra.

As accións de promoción a desenvolver no marco do obxecto do convenio, deberán garantir un alto impacto e visibilidade da colaboración prestada pola Deputación.

Por outra parte, en cumprimento do establecido na resolución de 15 de xuño de 2020, da Intervención Xeral da Administración do Estado pola que se regula o proceso de rexistro e publicación de convocatorias de subvencións e axudas no Sistema Nacional de Publicidade de Subvencións, e, en aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, a Base de Datos Nacional de





*Subvencións operará como sistema nacional de publicidade das subvencións. A tales efectos e para garantir o dereito dos cidadáns a coñecer todas as subvencións convocadas en cada momento e cara a contribuír aos principios de publicidade e transparencia, a Intervención Xeral da Administración do Estado publicará na súa páxina web as subvencións concedidas, segundo o establecido nos artigos 20.4 e 20.8.b da Lei 38/2003, de 17 de novembro, xeral de subvencións.*

#### **SEXTA. COMPATIBILIDADE CON OUTRAS SUBVENCIONES**

*A achega económica prevista no presente convenio será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou e organismos internacionais.*

*Porén, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo das contratacións subvencionadas.*

#### **SÉTIMA. XUSTIFICACIÓN DA SUBVENCIÓN**

*Os gastos xustificandos deberán axustarse aos conceptos incluídos no orzamento inicial, sen que se abone máis que o importe xustificando co límite da subvención concedida, establecendo unha porcentaxe de desviación máxima no custo dos diferentes conceptos da actividade subvencionada con respecto ao orzamento inicial do 20%.*

*A documentación xustificativa a presentar polo Concello, previa á realización do pago final, será a seguinte:*

*a) Conta xustificativa dos gastos, na que figurará a relación do custo ou gasto total da finalidade subvencionada, detallando as facturas ou documentos con valor probatorio no ámbito mercantil e administrativo.*

*b) Facturas ou documentos análogos con valor probatorio no ámbito mercantil e administrativo dos custos ou gastos polo importe da subvención concedida.*

*c) Declaración responsable de que os gastos que figuran na conta xustificativa se aplicaron á finalidade subvencionada. Así mesmo, indicárase que o resto de xustificantes da conta estarán a disposición da Deputación para o seu exame no caso de que sexa requirida.*

*d) Memoria explicativa e detallada da realización da finalidade.*

*e) Declaración das axudas solicitadas ou concedidas para a mesma finalidade procedentes das distintas administracións públicas ou doutros entes públicos ou privados, na que se indicará de ser o caso, a entidade concedente, data e importe total concedido.*

*f) Declaración responsable de non estar a beneficiaria incurso en ningunha das causas previstas no artigo 10.2 da Lei 9/2007, de 13 de xuño, de subvencións de Galicia, para ser beneficiaria desta axuda.*

*g) Xustificación da divulgación do financiamento da actividade por parte da Deputación.*

*h) Calquera outra documentación esixible pola normativa vixente para a correcta xustificación deste convenio ou que se considere necesaria para a comprobación da correcta execución do obxecto do convenio.*

*Así mesmo, o Concello poderá facer xustificacións parciais segundo se vaian executando durante cada unha das actuacións que serán obxecto do pago parcial da subvención correspondente por parte da Deputación. A estes efectos, o pagamento será proporcional ao importe das xustificacións presentadas.*



### **OITAVA. COMISIÓN DE SEGUIMIENTO**

*Para o seguimento e coordinación da execución deste convenio e resolución das dúbidas que poidan producirse na súa interpretación crearase unha comisión integrada por dous representantes de cada unha das administracións asinantes, un dos cales terá carácter técnico. Corresponderá á Comisión de Seguimento:*

- *A puntual recepción de información sobre todas as actuacións que se produzan na execución das actividades a que este convenio se refire.*
- *A coordinación técnica das entidades asinantes nos diversos aspectos técnicos e organizativos para favorecer a promoción, difusión e organización das actividades obxecto deste convenio.*
- *A coordinación entre as administracións asinantes na execución e financiamento do convenio, ditando ao efecto as instrucións oportunas.*
- *A resolución das dúbidas que presente a interpretación do convenio e, no seu caso, a emisión de informe se a dúbida ten de ser resolta polos órganos de goberno das administracións asinantes.*
- *A emisión de informe en relación con cantas incidencias se produzan na execución dos contratos a que este se refire.*
- *A formulación das propostas que procedan en relación ás cuestións a que os seus informes se refiran.*

*A Comisión de Seguimento reunirse cando o estime conveniente o seu responsable, por decisión propia ou a petición de calquera dos seus membros. As súas reunións terán lugar na sede da Deputación Provincial de Pontevedra ou na Casa do Concello de Pontevedra. Na reunión constituínte da Comisión de Seguimento designarase ao seu responsable e ao/á seu/súa secretario/a que levantará acta das súas reunións.*

### **NOVENA. VIXENCIA**

*O presente convenio producirá os seus efectos desde a data da súa sinatura ata a total execución das actividades ás que o mesmo se refire, que en todo caso non excederán do 31/12/2022, estendéndose o seu prazo de xustificación como máximo ata o 31/03/2023.*

### **DÉCIMA. EXTINCIÓN DO CONVENIO**

*O convenio extinguirase polo cumprimento das actuacións que constitúen o seu obxecto ou por incorrer en causa de resolución.*

*Serán causas de resolución:*

- 1º. O transcurso do prazo máximo de vixencia do convenio.*
- 2º. O acordo unánime dos asinantes.*
- 3º. O incumprimento das obrigas e compromisos asumidos por parte dalgún dos asinantes.*

*Neste caso, notificarase á parte incumpridora un requirimento para que, no prazo que se sinale, cumpra coas obrigacións ou compromisos que se consideran incumpridos. Este requirimento será comunicado tamén ao responsable da Comisión de Seguimento.*

*Se transcorrido o prazo indicado no requirimento persistira o incumprimento, a parte que o dirixiu notificará á outra parte a concorrencia de causa de resolución e entenderase resolto o convenio. A resolución do convenio por esta causa poderá dar lugar a indemnización dos danos e perdas causados.*



4º. *Por decisión xudicial declaratoria da nulidade do convenio.*

5º. *Por calquera outra causa distinta das anteriores prevista no convenio ou noutras leis.*

#### **UNDÉCIMA. RÉXIME XURÍDICO E XURISDICIÓN**

*O presente convenio ten natureza administrativa, rexéndose polas cláusulas establecidas nel, pola Lei 38/2003, do 17 de novembro, xeral de subvencións e polo Regulamento de desenvolvemento desta Lei, aprobado polo Real Decreto 887/2006, do 21 de xullo, pola Lei 9/2007, do 13 de xuño, de subvencións de Galicia e polas restantes normas de dereito administrativo; a lexislación básica do Estado en materia de réxime local; as Bases de Execución dos orzamentos das Administracións asinantes, a Ordenanza Xeral de Subvencións da Deputación de Pontevedra e polas restantes normas de dereito administrativo, e no seu defecto as normas de dereito privado.*

*Así mesmo, a falta de entendemento previo pola Comisión de Seguimento as partes quedan sometidas á xurisdición contencioso-administrativa na resolución de posibles controversias que puideran suscitar o incumprimento ou a interpretación do convenio.*

*E, como proba de conformidade, asinan o presente Convenio na data da sinatura electrónica.*

*O alcalde-presidente do Concello de Pontevedra, Miguel Anxo Fernández Lores*

*O secretario da Administración Municipal do Concello de Pontevedra, José Carlos Castiñeira Piñeiro*

*A presidenta da Deputación Provincial de Pontevedra, María del Carmen Silva Rego*

*O secretario da Deputación Provincial de Pontevedra, Carlos Cuadrado Romay”*

- FACULTAR á presidenta para formalizar o devandito Convenio de Colaboración mediante a súa sinatura.*
- DARLLE TRASLADO do presente acordo ao Concello de Pontevedra, á Intervención, ao Servizo de Cooperación, ao Gabinete da Presidencia e ao Gabinete de Prensa.*

*Pontevedra, na data da sinatura electrónica*

*A xefa do Servizo de Cooperación, Marina Piñeiro Novo*

*Conforme, o deputado delegado de Cooperación cos Concellos, Santos Héctor Rodríguez Díaz””*

Sometido a votación este asunto, a Comisión Informativa de Cooperación Municipal, Cooperación Transfronteiriza e Cohesión Social, ditamina favorablemente por unanimidade, cos votos a favor dos deputados do Grupo Provincial do PSdeG-PSOE (8), do Grupo Provincial do BNG (2), e do Grupo Provincial do Partido Popular (7), a proposta de acordo indicada anteriormente.

### **3.- DITAMINAR A APROBACIÓN DA RESOLUCIÓN DO RECURSO DE REPOSICIÓN INTERPOSTO POLO DEPUTADO PROVINCIAL D.MANUEL ALEJANDRO LORENZO ALONSO, CONTRA O ACORDO Nº 8.7861 ADOPTADO POLO PLENO NA SESIÓN**



**ORDINARIA DO DÍA 30/09/2022 REFERENTE A APROBACIÓN DO PROXECTO MODIFICADO DA ACTUACIÓN “CAMIÑO ESCOLAR SEGURO AO CEIP RAMIRO SABELL DE PONTEAREAS” PRESENTADO POLO CONCELLO DE PONTEAREAS AO ABEIRO DO PROGEAMA REACPON (Expte. 2021040010)**

Sométese ao ditame da Comisión Informativa de Cooperación Municipal, Cooperación Transfronteiriza e Cohesión Social a seguinte proposta de resolución do recurso de reposición interposto polo deputado provincial D. Manuel Alejandro Lorenzo Alonso conta a aprobación do proxecto modificado da actuación “Camiño escolar seguro ao CEIP Ramiro Sabell de Ponteareas” do Programa REACPON, de conformidade co establecido nos artigos 123 e 126 do R.D. 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais, con carácter previo á súa elevación ante o órgano competente para a súa aprobación:

**“ASUNTO: RESOLUCIÓN DO RECURSO DE REPOSICIÓN INTERPOSTO POLO DEPUTADO PROVINCIAL D.MANUEL ALEJANDRO LORENZO ALONSO, CONTRA O ACORDO Nº 8.7861 ADOPTADO POLO PLENO NA SESIÓN ORDINARIA DO DÍA 30/09/2022 REFERENTE A APROBACIÓN DO PROXECTO MODIFICADO DA ACTUACIÓN “CAMIÑO ESCOLAR SEGURO AO CEIP RAMIRO SABELL DE PONTEAREAS” PRESENTADO POLO CONCELLO DE PONTEAREAS AO ABEIRO DO PROGEAMA REACPON (Expte.- 2021040010)**

#### **ANTECEDENTES**

1.- Por acordo núm. 7.7624 do Pleno de data 28/05/2021 a Deputación de Pontevedra aprobou as Bases Reguladoras do Programa provincial de infraestruturas e dotacións singulares para a recuperación post-COVID-19-Programa REACPON (Reacciona Pontevedra Provincia), sendo publicadas no BOPPO núm. 102, do 01/06/2021, e outorgando un prazo de presentación de solicitudes de dous meses a partir de dita publicación. A base reguladora 10ª relativa a documentación complementaria recolle dentro da mesma a necesidade dun certificado expedido polo funcionario público competente no que se acredite (anexo IV) “*a titularidade municipal, ou a súa cesión, dos elementos con estas características, que deberá ser efectiva antes de que finalice o prazo de presentación de solicitudes. Desta forma esta efectividade considerárase non emendable*”. Ademais a base reguladora 2ª sinala que a lei xeral de subvencións será de aplicación supletoria.

2.- O concello de Ponteareas presentou unha solicitude a cargo do referido programa REACPON para a actuación “Camiño escolar seguro ao CEIP Ramiro Sabell de Ponteareas” dentro da Liña 3, cun orzamento de 963.527,36 euros, e que foi tramitada no expediente nº 2021040010. Na documentación que achegou o Concello figura a certificación do Secretario, asinada dixitalmente o 30/07/2022, na que consta “*Bens de titularidade da deputación de Pontevedra: titular da estrada EP-4001 (Rúa Trovador Juan García de Guillade), no tramo coincidente co proxecto que comprendería desde o Km 0 ata o Km 900. No día 30 de xullo de 2021 recibíuse contestación pola Deputación de Pontevedra (código seguro de verificación:L1PVS0YSODQ0GFZM) indicando que “na actualidade tramítase a proposta de aprobación de transferencia e, posterior entrega ao Concello de Ponteareas, por considerarse conforme co disposto no preámbulo no artigo 9 da Lei 8/2013, de 28 de xuño, de estradas de Galicia e no artigo 18 do Decreto 66/2016, de 26 de maio, polo que se aproba o Regulamento*



*xeral de estradas de Galicia. O que se informa, a pedimento do Concello, para os efectos de conformidade coa inclusión do proxecto no Programa Provincial Post-covid 19 (REACPON), ao abeiro da convocatoria publicada no BOPPO de 1 de xuño de 2021”.*

3.- Por acordo núm. 8.7674 do Pleno do día 24/09/2021 aprobouse o cambio de titularidade e posterior entrega ao concello de Ponteareas dun treito de 900 metros lineais da EP-4001 Ponteareas-Guillade p.q. 0+000 ata o p.q. 0+900 (Expediente 2021037349). No corpo da acta desa sesión plenaria se recolle que a solicitude de transferencia foi informada favorablemente polos servizos técnicos de infraestruturas e viales provinciais con data 29 de xullo de 2021, e da Intervención provincial con data 08/09/2021. Tamén se recolle que a solicitude de cambio de titularidade se fixo porque o proxecto ía a ser incluído na convocatoria de REACPON da Deputación. Este acordo plenario foi aprobado por unanimidade.

4.- Por acordo núm. 4.7719 do Pleno do día 17/12/2021 aprobouse a concesión de subvencións ao abeiro da convocatoria do Programa Reacon, sendo uns dos concellos beneficiarios o de Ponteareas pola actuación “Camiño escolar seguro ao CEIP Ramiro Sabell de Ponteareas” cunha subvención de 722.645,52 euros nun orzamento de 963.527,36 euros, o importe restante de 240.881,84 euros é cargo do propio concello de Ponteareas. A concesión se fixo condicionada “*á efectividade do cambio de titularidade do viario*”. Este acordo de concesión foi aprobado por unanimidade.

5.- No Boletín oficial de Galicia núm. 26 de data 08/02/2022 publicouse o Decreto 9/2022, do 27 de xaneiro, polo que se aproba o cambio de titularidade, a prol do Concello de Ponteareas, dun treito da estrada provincial EP-4001 Ponteareas-Guillade, punto quilométrico 0+000 ata o punto quilométrico 0+900. O artigo 3 deste Decreto dispón que “*de acordo co establecido no artigo 9.6 da Lei 8/2013, do 28 de xuño, de estradas de Galicia, o cambio de titularidade será efectivo ao día seguinte da publicación deste decreto no Diario Oficial de Galicia. A entrega dos bens formalizarase no prazo de dous meses seguintes a esta publicación mediante a sinatura do correspondente acta de entrega entre concello e deputación*”. E o artigo 4 engade que “*corresponderanlle ao Concello de Ponteareas, a partir da formalización da entrega, todas as actividades das funcións de disciplina viaria e calquera outra que puidese corresponderlle como nova Administración titular das estradas*”.

6.- No BOPPO núm. 94 de data 18/05/2022 publicouse o catalogo de estradas de titularidade da Deputación de Pontevedra a día 01/01/2022, e na relación de tales estradas aínda continúan na EP-4001 Ponteareas-Guillade como provinciais e non municipais os metros cedidos ao concello de Ponteareas.

7.- Mediante rexistro web2022054886 de data 24/10/2022 polo deputado provincial D. Manuel Alejandro Lorenzo Alonso se interpón escrito de reposición no que solicita que se deixe sen efecto, o acordo adoptado no punto 8 da orde do día da sesión plenaria ordinaria celebrada o día 30 de setembro de 2022 referente a aprobación do proxecto modificado da actuación “Camiño escolar seguro ao CEIP Ramiro Sabell de Ponteareas” presentado polo concello de Ponteareas ao abeiro do Programa REACPON.

8.- No BOPPO núm. 193 de data 07/10/2022 publicouse o extracto de acordos adoptados polo Pleno da Deputación en sesión ordinaria de 30 de setembro de 2022, no que se reflexa que o punto 8 foi aprobado por maioría de votos a favor do PSdeG-PSOE e do BNG, e cos votos en contra do PP, grupo ao que pertence o Sr. Lorenzo Alonso.



9.- Remitidas as actuacións do instruído á Secretaría Xeral, por esta emitíuse Informe en data 14/11/2022, no que remata por considerar que *“o acordo Plenario de 17 de decembro de 2021, de concesión de subvencións ao abeiro da convocatoria do programa provincial de infraestruturas e dotacións singulares para recuperación post-covid-19. Programa Reacpon (Reacciona Pontevedra Provincial) polo que foi outorgada a subvención ao concello de Pontearreas non foi recorrido, acto este do que trae causa o que agora se impugna, polo que o mesmo devén firme e consentido, xa que como ven dicir constante xurisprudencia, rexe o principio xurídico de congruencia (nemo auditur propiam turpitudinem allegans)”*.

## **FUNDAMENTACIÓN XURÍDICA**

### **I.- NORMATIVA EXAMINADA**

- Lei 38/2003, de 17 de novembro, xeral de subvencións (LXS) e o seu Regulamento aprobado por R.D. 887/2006, de 21 de xullo (RLXS)
- Lei 9/2007, de 13 de xuño, de subvencións de Galicia (LSG)
- Lei 7/1985, de 2 de abril, reguladora das bases do réxime local (LRBRL)
- Lei 39/2015, de 1 de outubro, do procedemento administrativo común das Administracións Públicas (LPACAP)
- Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades locais (ROFRJEL).
- Bases de execución do vixente orzamento provincial.
- Bases reguladoras do Programa REACPON
- Ordenanza xeral de subvencións da Deputación.
- Lei 37/2015, de 29 de setembro, de estradas
- Lei 8/2013, de 28 de xuño de estradas de Galicia
- Decreto 66/2016, de 26 de maio, polo que se aproba o Regulamento xeral de estradas de Galicia
- Código Civil autorizado pola Lei de Bases de 11 de maio de 1888

### **II.- CONSIDERACIÓNS XURÍDICAS**

1.- O escrito de interposición do recurso de reposición está centrado na nulidade de pleno dereito ao abeiro do artigo 47 da Lei 39/2015, de 1 de outubro (LPAC no sucesivo), de procedemento administrativo común, pero sen precisar en concreto ningunha das posibles causas, e equiparando eficacia con validez, sen embargo, no Dereito Administrativo se deslindan claramente dous cuestións diversas; a eficacia e a validez dos actos administrativos. A validez estudia elementos intrínsecos do acto, cuxa carencia ou inobservancia provoca vicios que determinan a súa invalidez. Polo contrario, a eficacia analiza o momento no que os actos administrativos poden levarse a efecto, sendo aptos e susceptibles de aplicación; é cuestión relativa, entón, aos requisitos extrínsecos que debe reunir o acto administrativo, xa sexa válido ou inválido, para que o seu contido poida levarse a efecto. Esta distinción non é propia e exclusiva do Dereito Administrativo, pois resulta común a todas as ramas do coñecemento xurídico. Por exemplo, cando se realiza unha compravenda a prazos despois se pasan ao cobro as correspondentes letras ou pagos; unha letra de pago aprazado é válida cando se expide con todos os requisitos correspondentes, pero só é eficaz a partir da súa data de cobro; se pretende facerse efectiva a letra con anterioridade desa data, non se conseguirá o seu cobro.



2.- Como é coñecido, con arranxo ao artigo 39 da LPAC, os actos administrativos se presumen válidos e producen os seus efectos dende a data na que se ditan, salvo que en eles se dispoña outra cousa. En consecuencia, os actos administrativos son aptos para producir efectos -para aplicarse- dende o mesmo momento en que son ditados, sen que se precise a satisfacción de ningún requisito adicional: é o que se coñece como principio de autotutela declarativa da Administración. Dese xeito, os actos administrativos crean, modifican ou extinguen unilateralmente situacións xurídicas, sen necesidade de ningún outro requisito externo; é o que se cualifica como acto executivo. Non obstante, existen supostos de eficacia demorada, nos que se impón o cumprimento de certos requisitos -notificación, publicación- en orde a recoñecer a eficacia do acto. Pero tamén hai supostos nos que a eficacia é retroactiva é dicir, que os actos administrativos teñen eficacia a partir dun momento anterior a aquel en que foron ditados. E ao igual que pasa no Dereito Común, artigos 1.113 e 1114 do Código Civil xunto co artigo 149.3 da Constitución Española, as obrigas poden estar sometidas a un elemento accidental como unha condición, é dicir, un suceso futuro ou incerto do cal dependerá o seu cumprimento.

3.- Cando se concedeu a subvención ao concello de Ponteareas, a eficacia do acto de concesión como tal non se xebrou del, non houbo unha postergación do recoñecemento ao concello da condición de beneficiario do Programa REACPON, nin tampouco houbo ningún vicio de nulidade. O que sucedeu foi que o acto de concesión se condicionou a un evento futuro para despreñar a súa eficacia, en particular a constatación oficial da transferencia da titularidade dun tramo da estrada provincial EP-4001 Ponteareas-Guillade mediante a súa publicación no Diario Oficial de Galicia porque así o demanda a lexislación sectorial. Pero esta lexislación sectorial di claramente “eficacia” non di “validez”, artigo 9.6 da Lei 8/2013, de 28 de xuño de estradas de Galicia, ao igual que o artigo 18.3 do seu Regulamento aprobado polo Decreto 66/2016 de 26 de maio.

4.- O requisito da publicación do cambio de titularidade para acadar a eficacia tamén ten que ser atemperado, pois a referida Lei 8/2013 de estradas de Galicia establece na exposición de motivos que “a titularidade que se recoñece ás distintas administracións territoriais sobre as estradas aparece vencellada a súa inclusión nos respectivos catálogos de estradas, que se configuran desa maneira como instrumentos públicos que serven para identificar e inventariar as estradas da súa titularidade”. Cando o cambio de titularidade de tramos de estradas xa ten a consideración de modificación do catálogo, artigo 10.4 e 6 da Lei 8/2013, mentres que a experiencia ou a práctica xurídica, nos amosa que os catálogos son obxecto de publicación actualizada por anualidade.

5.- A Base Reguladora Décima do Programa Reacpon, en efecto, indica que a titularidade municipal, ou a súa cesión, dos elementos nos que se van a desenvolver as actuacións, deberá ser efectiva antes de que finalice o prazo de presentación de solicitudes. E engade como tamén indica a parte impugnante, que “desta forma esta efectividade considerárase non emendable”. Que a titularidade ou a cesión sexa efectiva antes de rematar o prazo de presentación de solicitudes non quere dicir que o acto de concesión da subvención teña que ser sempre puro, ou que nunca se poida subordinar ao cumprimento dunha condición positiva de índole solemne como a publicación dun diario oficial.

6.- O que quere dicir esta Base é, que dentro do prazo de presentación de solicitudes non se poden validar negocios incompletos ou anulables, nin tampouco se poden presentar solicitudes que non teñen apoio real na execución ou *efectividade* das competencias municipais. Isto é así porque ao tempo de rematar o prazo de presentación de solicitudes



cada concello participante ten que estar en condicións de poder exercer a competencia municipal sobre os bens nos que pretende actuar, en calidade de titular. E o concello de Pontearreas si que estaba en esta situación, xa que o informe do Servizo de Infraestruturas e Mobilidade da Deputación establece que *“este treito, que recibe a denominación municipal de Rúa Trovador Juan García de Guillade, ten na actualidade unhas características **funcionais e de utilidade, que son asimilables ao viario municipal** de tipo urbano dada conta que dispón de beirarrúas e ambas marxes, bandas laterais de aparcamento de vehículos e alumeado público”*.

7.- O concello de Pontearreas solicitou o cambio de titularidade en data 12/07/2021 acompañado de datos obxectivos e substantivos, debido ás características municipais que ten a estrada provincial, a cal xa non presenta características de vía provincial no referido tramo a tenor do mesmo informe técnico. O significativo é que o artigo 55 da Lei de bases de réxime local, Lei 7/1985, de 2 de abril, lembra a necesidade de respectar o exercicio lexítimo por outras administracións das súas competencias e as consecuencias que do mesmo se derivan para as propias, ao igual que o artigo 140 da Lei 40/2015, de 1 de outubro, de réxime xurídico do sector público.

8.- O escrito do recurso de reposición trae a colación o suposto do concello de Ribadumia, que na sesión plenaria do día 17/12/2021 foi desestimada no marco do Programa REACPON, por *non dispoñer da titularidade dos terreos ou dun dereito de uso ou cesión sobre estes que teña unha duración indefinida, xa que a actuación que se pretende realizar afecta a un viario de titularidade provincial (apartado 1 da base 6ª)*. Pois ben, por unha banda, este acordo foi deliberado, votado e aprobado por unanimidade xunto a concesión ao concello de Pontearreas nun único acto. E por outra banda, non hai constancia de que o concello de Ribadumia solicitara o cambio de titularidade da estrada, nin tampouco hai documento técnico algún que avale que a estrada provincial teña características de vía municipal. Sen esquecer que o acordo plenario do día 17/12/2021 só está impugnado en vía xudicial polos concellos de O Porriño e Soutomaior, para os demais concellos participantes, e para a propia Deputación, pasa en autoridade de acto consentido e firme.

9.- En todo caso, o recurso está centrado no acordo plenario nº 8.7861 de data 30/09/2022, que aproba o proxecto modificado da actuación do concello de Pontearreas e unha eventual estimación do recurso non lle priva de validez e eficacia ao acordo anterior de concesión, nin fai que o concello de Ribadumia sexa beneficiario do Programa REACPON. Ao sumo o que faría é que se tería que executar unha obra cun proxecto que xa non responde as necesidades actuais, isto non ten respaldo legal, vai en contra da lealdade institucional e a adecuación ao orde de distribución de competencias establecido na normativa do réxime local.

### III.- REXIME COMPETENCIAL

De acordo co establecido no artigo 123 da Lei 39/2015, a competencia para resolver é a do mesmo órgano que ditou a resolución impugnada, no caso o Pleno da Deputación Provincial.

### CONCLUSIÓNS:

Polo exposto, propónse desestimar o recurso de reposición interposto polo deputado provincial D. Manuel Alejandro Lorenzo Alonso contra o acordo plenario nº 8.7861 do día 30/09/2022, confirmando na súa integridade a aprobación do proxecto modificado da





actuación “*Camiño escolar seguro ao CEIP Ramiro Sabell de Ponteareas*” presentado polo concello de Ponteareas ao abeiro do Programa REACPON (Expte.- 2021040010).

De acordo cos antecedentes e os fundamentos de dereito, xunto a conclusión a cal chega, no exercicio das competencias recollidas no art. 35 da LRBRL, no artigo 63 do ROFRXEL e as Bases específicas de execución do orzamento para o exercicio 2022, e vistos os informes da Xefatura de Servizo de Cooperación (CSV: ZVASYSWXXKQC5P5Z), da Secretaría Xeral (CSV: GA6FKM5S5F7QB554), sométese ao Ditame da Comisión Informativa de Cooperación Municipal, Cooperación Transfronteiriza e Cohesión Social a seguinte PROPOSTA DE ACORDO:

- Aprobar a desestimación do recurso potestativo de reposición interposto polo Deputado provincial D. Manuel Alejandro Lorenzo Alonso contra o acordo nº 8.7861 adoptado polo Pleno en sesión ordinaria do día 30/09/2022 referente a aprobación do proxecto modificado da actuación “*Camiño escolar seguro ao CEIP Ramiro Sabell de Ponteareas*” presentado polo concello de Ponteareas ao abeiro do Programa REACPON (Expte.- 2021040010), confirmado o decidido na súa integridade.
- Darlle traslado do presente acordo ao Deputado Provincial D. Manuel Alejandro Lorenzo Alonso, á Intervención, ao Servizo de Cooperación e ao Gabinete da Presidencia.”

Sometido a votación este asunto, a Comisión Informativa de Cooperación Municipal, Cooperación Transfronteiriza e Cohesión Social, ditamina favorablemente por maioría, cos votos a favor das/os deputadas/os do Grupo Provincial do PSdeG-PSOE (8), do Grupo Provincial do BNG(2), e en contra do Grupo Popular (7).

#### **4.- DITAMINAR A ACEPTACIÓN DA RENUNCIA DO CONCELLO DE CERDEDO-COTOBADÉ Á SUBVENCIÓN CONCEDIDA, NO MARCO DO PROGRAMA PROVINCIAL DE INFRAESTRUTURAS E DOTACIÓNS SINGULARES PARA A RECUPERACIÓN POST-COVID-19. PROGRAMA REACPON (REACCIONA PONTEVEDRA PROVINCIA) (Expte. 2021039977)**

Sométese ao ditame da Comisión Informativa de Cooperación Municipal, Cooperación Transfronteiriza e Cohesión Social a seguinte proposta de acordo, de conformidade co establecido nos artigos 123 a 126 do Real Decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das Entidades Locais, con carácter previo á súa elevación ante o Pleno para a súa aprobación:

**“ASUNTO: ACEPTACIÓN DA RENUNCIA DO CONCELLO DE CERDEDO-COTOBADÉ Á SUBVENCIÓN CONCEDIDA, NO MARCO DO PROGRAMA PROVINCIAL DE INFRAESTRUTURAS E DOTACIÓNS SINGULARES PARA A RECUPERACIÓN POST-**



**COVID-19. PROGRAMA REACPON (REACCIONA PONTEVEDRA PROVINCIA) (Expte. 2021039977)**

ANTECEDENTES

- No marco do Programa REACPON (Reacciona Pontevedra Provincia) (Bases reguladoras e convocatoria aprobadas mediante acordo núm. 7.7624 do Pleno da Corporación Provincial de data 28/05/2021 e publicadas no BOPPO núm. 102 de 01/06/2021), mediante acordo núm. 4.7719 de 17/12/2021, o Pleno da Corporación Provincial aprobou a concesión dunha subvención, polo procedemento de concorrencia competitiva, ao Concello de Cerdedo-Cotobade, por importe de 391.991,61 euros, co obxecto do financiamento do investimento "REFORMA INTEGRAL DA "CASA DO CONCELLO" DE CERDEDO-COTOBADA". De acordo co previsto na base reguladora 7ª.2.h) do dito Programa, "tras a resolución definitiva asinarase un convenio cos concellos beneficiarios, no que se definirán as actuacións obxecto de subvención, no caso de que os proxectos contemplan varias actuacións, e estableceranse de maneira pormenorizada os seus deberes".
- Mediante Resolución Presidencial núm. 2021007866 de 30/12/2021 aprobouse o correspondente convenio de colaboración co fin de definir as actuacións obxecto de subvención e concretar de xeito pormenorizado as obrigas das partes, o cal se asinou o día 25/01/2022. O Convenio, de acordo coas porcentaxes de cofinanciamento previstas nas bases da convocatoria para cada caso, distribúe o financiamento do investimento, cun orzamento total de 489.989,51€, entre a Deputación, mediante a achega do Programa REACPON (aplicación orzamentaria 2022/942.9420.762.75.2021) e o Concello, mediante unha achega con cargo aos seus fondos propios ou con outro tipo de axudas que a entidade local poida obter, de acordo coa seguinte táboa:

	<b>Achega</b>	<b>Porcentaxe</b>
<b>Deputación</b>	391.991,61€	80,00%
<b>Concello</b>	97.997,90€	20,00%
<b>Total</b>	489.989,51€	

- Na data 31/03/2022 o concello presenta no Rexistro da Deputación (núm. Rexistro WEB2022018437) unha Resolución da Alcaldía declarando deserto o procedemento de licitación do contrato de obra "REFORMA INTEGRAL DA "CASA DO CONCELLO" DE CERDEDO-COTOBADA" e un informe do Sr. Alcalde para aclarar que "se fixo unha sondaxe informal entre varias empresas do sector para tratar de aclarar o motivo polo cal quedou deserta a licitación, chegando á conclusión que os prezos do proxecto non se axustaban á realidade actual; e polo tanto non cubrían o custo da realización das obras".
- Na data 26/04/2022 o concello presenta no Rexistro da Deputación (núm. Rexistro WEB2022025227) un proxecto reformulado do proxecto inicial (emendado o 05/05/2022 (Rexistro WEB2022028672) no que o orzamento aumenta 424.193,99€



(86,57%) ata o importe de 914.183,50€ e a certificación do acordo do Pleno municipal de aprobación do proxecto reformulado. Mediante o acordo nº 7.7799, o Pleno da Corporación Provincial de 27/05/2022, acordou aprobar o proxecto reformulado.

- Visto que, por Resolución Provisional da Convocatoria de axudas para a rehabilitación de edificios de titularidade pública no marco do Plan de Recuperación, Transformación e Resiliencia da Dirección Xeral de Axenda Urbana e Arquitectura do MITMA de data 25/10/2022, non se lle concede ao Concello a subvención solicitada e que, nestas condicións o Concello non conta coa existencia do crédito necesario para a realización do proxecto “Reforma Integral da Casa do Concello de Cerdedo-Cotobade”, incluído no programa REACPON, na data 28/10/2022 o Concello presenta por Instancia Xenérica no Rexistro da Deputación (núm. rexistro WEB202205591) unha certificación da Resolución da presidencia de data 28/10/2022, resolvendo “Renunciar á concesión de subvención concedida ao abeiro do programa REACPON do proxecto “Reforma Integral da Casa do Concello de Cerdedo-Cotobade”, por importe de 391.991,61€, e solicitar a extinción do Convenio asinado”.
- Na data 09/11/2022 a xefa do Servizo de Cooperación emite informe-proposta favorable á aceptación da renuncia.
- Na data 15/11/2022 a Intervención provincial emite dilixencia de conformidade respecto do informe-proposta do Servizo de Cooperación.
- Sométese, así mesmo, ao ditame da Comisión Informativa de Cooperación cos Municipios, Cooperación Transfronteiriza e Cohesión Social.

## FUNDAMENTOS DE DEREITO

### Réxime Xurídico:

- Lei 38/2003 de 17 de novembro, Xeral de Subvencións (LXS) e o seu Regulamento aprobado por Real Decreto 887/2006, de 21 de xullo (RLXS)
- Lei 9/2007, de 13 de xuño, de Subvencións de Galicia (LSG), e o seu Regulamento aprobado por Decreto 11/2009, de 8 de xaneiro (RLSG)
- Lei 7/1985, de 2 de abril, Reguladora das Bases do Réxime Local (LRBRL)
- Lei 39/2015, de 1 de outubro, do Procedemento Administrativo Común das Administracións Públicas (LPACAP)
- Lei 40/2015, de 1 de outubro, de Réxime Xurídico do Sector Público (LRXSP)
- Real Decreto Lexislativo 2/2004, de 5 de marzo polo que se aproba o Texto Refundido da Lei Reguladora das Facendas Locais (TRLRFL)
- Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais (ROFRXEL)
- Real Decreto Lexislativo 781/1986, de 18 de abril, polo que se aproba o texto refundido das disposicións legais vixentes en materia de Réxime Local (TRRL)
- Ordenanza Xeral de Subvencións da Deputación de Pontevedra, aprobada no Pleno provincial do 28 de outubro de 2016 e publicada no BOPPO do 30 de decembro de 2016 (OXSDPEO)



- Bases reguladoras e convocatoria do Programa Provincial de Infraestruturas e Dotacións Singulares para a Recuperación post-Covid-19 – Programa ReacPon (Reacciona Pontevedra Provincia)
- Bases de execución do orzamento da Deputación para o vixente exercicio

### CONSIDERACIÓNS XURÍDICAS

#### Instrución do expediente:

- Base Reguladora 7ª da convocatoria, pola que a instrución do procedemento correspóndelle á xefa do Servizo de Cooperación.

#### Petición e evacuación de informes:

- Artigos 79 e 80 da Lei 39/2015, de 1 de outubro, do procedemento administrativo común das Administracións Públicas, sobre a petición e a evacuación de informes.
- Artigo 88.6 da Lei 39/2015, de 1 de outubro, do procedemento administrativo común das Administracións Públicas, que sinala que a aceptación de informes ou ditames servirá de motivación á Resolución cando se incorporen ao texto da mesma.

#### Procedencia da renuncia:

- Artigo 94 de Lei 39/2015, de 1 de outubro, de Procedemento Administrativo Común das Administracións Públicas, que establece que todo interesado poderá desistir da súa solicitude ou, cando non estea prohibido polo ordenamento xurídico, renunciar aos seus dereitos. Pola súa banda os puntos 3 e 4 deste artigo establecen que tanto a desistencia como a renuncia poderán facerse por calquera medio que permita a súa constancia e a Administración as aceptará de plano e declarará concluso o procedemento salvo que, téndose presentado no mesmo terceiros interesados, instasen estes a súa continuación no prazo de dez días dende que foron notificados da desistencia ou da renuncia.

#### Competencia para resolver:

- En virtude das competencias recollidas no artigo 33 da LRBRL, no artigo 50 do ROFRXEL, no artigo 185 do TRLRFL, no artigo 63 do RLXS, no artigo 16 da OXSDEPO, nas bases específicas de execución do vixente orzamento provincial e demais lexislación de aplicación, correspóndelle ao Pleno a aceptación da renuncia.

### CONCLUSIÓNS

Xuridicamente a renuncia é a declaración unilateral do interesado de abandonar unha pretensión nun procedemento xa iniciado configurándose como un modo anormal de terminación do mesmo.

O artigo 94 da LPACAP, contempla de forma conxunta a desistencia e a renuncia como modos de terminación do procedemento. A renuncia implica o abandono definitivo da pretensión que xa non poderá exercitarse novamente, mentres que a desistencia opera unicamente sobre o procedemento e non afecta ao posible novo exercicio do dereito.

A Lei esixe como requisitos da renuncia, a solicitude do interesado dirixida ao órgano administrativo competente para resolver e a súa práctica por calquera medio que permita a súa constancia (sempre que incorpore as firmas que correspondan).



Con suxeición ao antedito, o Concello de Cerdedo-Cotobade presenta, en data 28/10/2022 a súa renuncia formal á subvención concedida, ao abeiro do Programa Provincial de infraestruturas e dotacións singulares para a recuperación Post-Covid-19. Programa REACPON (Reacciona Pontevedra Provincia), co obxecto do financiamento da actuación do investimento "Reforma Integral da Casa do Concello de Cerdedo-Cotobade", debido a que, ao non serlle concedida a subvención solicitada na convocatoria de axudas para a rehabilitación de edificios de titularidade pública no marco do Plan de Recuperación, Transformación e Resiliencia (PRTR), o Concello non conta coa existencia do crédito necesario para a realización do proxecto.

Por todo o exposto, e á vista dos antecedentes e fundamentos de dereito sinalados, o informe da xefa do Servizo de Cooperación de 09/11/2022 (CSV: Q4OBKX36YWolKMML) e a dilixencia de conformidade de Intervención de 15/11/2022 (CSV: NGX8JIENHCX3V2FZ), sométese ao ditame da Comisión Informativa de Cooperación Municipal, Cooperación Transfronteiriza e Cohesión Social a seguinte PROPOSTA DE ACORDO:

- ACEPTAR a renuncia do Concello de Cerdedo-Cotobade á subvención concedida por importe de 391.991,61 euros, no marco do Programa provincial de infraestruturas e dotacións singulares para a recuperación Post-Covid-19. Programa REACPON (Reacciona Pontevedra Provincia), co obxecto do financiamento da execución da actuación denominada "Reforma integral da "Casa do Concello" de Cerdedo-Cotobade" (Expte.- 2021039977).
- DARSE POR EXTINGUIDO o Convenio de colaboración asinado, segundo o establecido na cláusula 12ª do mesmo.
- DARLLE TRASLADO do presente acordo ao Concello de Cerdedo-Cotobade, a Intervención, ao Servizo de Cooperación e ao Gabinete de Presidencia"

Sometido a votación este asunto, a Comisión Informativa de Cooperación Municipal, Cooperación Transfronteiriza e Cohesión Social, ditamina favorablemente por unanimidade, cos votos a favor das/os deputadas/os do Grupo Provincial do PSdeG-PSOE (8), do Grupo Provincial do BNG (2), e do Grupo Provincial do Partido Popular (7).

## **5.- ROGOS E PREGUNTAS**

Non houbo.

E non habendo máis asuntos que tratar, a Presidencia dá por finalizada a reunión, sendo as doce horas e quince minutos, do que, como secretaria, dou fe.

Pontevedra, na data da sinatura electrónica  
A Secretaria da Comisión,  
(*documento asinado electronicamente*)  
Marina Piñeiro Novo

